

Un pida historia di nos turismo

Según e buki: "Ayerá, Awe ...y Mayan" di Dr. Rory Arends

NA 1956, e gobierno di nos isla tabata hopi motiva y a aproba plannan pa e construcion di un hotel turistico di luho na Palm Beach, cual lo hiba e nomber Aruba Caribbean Hotel.

Dos visionario local, Juan Enrique Irausquin – e homber cu a inspira e nomber di nos boulevard - y Oscar Henriquez, a skirbi un rapport largo yena cu recomendacionnan pa loke tabata construcion di e hotel aki. Nan a acumula informacion y inspiracion door di biaha pa Miami y Puerto Rico, y a dicidi riba un modelo apropiada pa Aruba su industria creciente di turismo. Tur dos a conclui cu Aruba su playanan ta esunnan miho, y cu e isla por pone su metanan mas haltu, atrayendo 'miho' cliente buscando luho.

A cuminsa cu prepara e infraestructura, y ya pa aña 1957 un carretera a wordo construi cu ta alcanza di Oranjestad te na Hotel Basi Ruti, y sigui te na aeropuerto. A percura tambe pa pone facilidad di awa, coriente y telefon.

Juancho Irausquin y Oscar Henriquez a haci masha hopi esfuerço y a logra haya un compania di Chicago – Executive House – cu ya tabata tin hotel na Puerto Rico, pa maneha e hotel na Aruba. Esaki el a haci bou nomber di Condado Aruba Caribbean Hotel-Casino, den cadena cu hotel Hotel Condado Beach na Puerto Rico. E hotel-resort-casino a habri oficialmente na juli 1959.

Dr. Rory Arends a dedica mas di 30 aña na turismo di Aruba. Esnan interesa den e buki of contacto cu e autor por tuma contacto cu e distribuidor ELKA & Associates N.V. na telefon 5884600 of e-mail info@elka-aruba.com. "Ayerá, Awe...y Majan? Turismo y Aruba" tambe ta ob- tenibel na tur libreria na Aruba.

